

«Adüna daplü glied and fa adöver»

Ils servezzans dal Spitex Engiadina Bassa sun fich bainvis

■ (anr/map) L'agüd e la chüra da sandà e d'amalats externa, nomnada Spitex, es üna pozza importanta sül sector da la sandà. Als 2 da mai es stat il di naziunal chi sta ingon suot l'insaina «Per vegl e giuven». La lavur cha'l Spitex spordscha es fich variada. Ella nu vain tratta a nüz-be da singulas personas attempadas ma eir da glied giuvna e da famiglias. Sper las chürunzas sun tscherchadas pustüt las agüdonas da chasada.

L'arcugnuschentscha es fich gronda

«Eu sun statta cuntainta d'avair chattà quist'interessanta lavur davo ch'eu nu vaiva plü piazza sco magistra», disch Marietta Cavigilli-Hischier. Ella es oriunda dal Valais ed es rivada per cas a Tarasp ingio ch'ella ha lavurà ün on illa scoula dad Avrona. Siond cha sia scolaziun nu bastaiva per accompagnar ils giuvenils s'ha'la annunzchada pro'l Spitex ed ha fat il cuors da la Crusch cotschna. Quai es capità avant set ons e mez ed ella nu s'ha mâ inrüclada d'avair fat quist pass. «La lavur da far l'economia da chasa per las personas in bsögn m'ha dat satisfacziun. Vairamaing nu vaiva ingün'idea da quist'organisaziun e per mai es quai stat üna gronda sfida», manaja Marietta Cavigilli ch'ed es entrada be d'incuort in pensiu. Sia lavur consistiva dal güdar pro la tualetta da la daman, dal parderdscher la culazchun, da pisseran cha'l cliaint piglia seis medicaments, da far las pulizias, d'accompagnar a spass, da far las lezchas e da far gös. Excepsiunmaing ha'la gnü eir da far fö e cumischius. «L'ingaschamaint pro'l Spitex prentenda d'esser flexibel. Id es da passar per part plüssas jadas al di pro'ls cliaints e'ls viadis nu sun neir adüna be agreabels», manaja l'antieriura magistra chi agiund-scha cha per furtüna gjaja ella jent cul auto. Ella ha gnü inscuters interessants e per ella es quai stat ün'experiencia da vita: «La recugnuschentscha es statta trasoura fich gronda. Pels cliaints nun esa adüna simpel e leiv d'acceptar ch'inchiün aintra illa sfera privata.» A regard la lingua manaja ella: «I füs stat bun sch'eu



Biers cliaints sun glied attempada chi po, grazcha a la Spitex, star amo a chasa.

MAD

vess savü rumantsch. Ma quai es üna lingua talmaing estra ed originala ch'eu nu sun statta capabla da tilla imprendere. Culs cliaints attempats n'haja suvent discurrü tudais-ch da scrittüra.» Marietta Cavigilli es da l'avis cha la spüerta dal Spitex facilitescha a la glied attempada il pass aint illa dmura d'attempats. Dürant quists ultims ons ha'la constarà chi dà adüna daplüs cliaints cun problems psichics. Ella ha l'impreschiun cha la glied fetscha vieplü adöver da las spüertas dal Spitex: «Las retgnentschas s'han diminuidas, i nu's svarguogna dad avair dabsögn d'agüd.» La Valesana es grata pel temp in Engiadina e loda la buna collavuraziun da la squadra chi s'in-scuntra üna jada l'eivna pel rapport, ün'ocasiun per discuter tuot ils pro-

blems. Insebel cun seis hom tuorn'la bainbod in sia patria ad Oberems ingio ch'els han surrut la chasa paterna.

«Il Spitex es stat meis salvamaint»

Florence Emmenegger ha dovrà plüssas jadas il sustegn da la Spitex: «Davo las duos naschentschas da meis uffants Lara e Marec ch'eu n'ha passantà a chasa n'haja pudü profiter da l'agüd per cuort temp. Las impiegadas dal Spitex han fat la chasada, cuschinà, fat süt ils pops, fat las cumpritas e las pulizias.» Avant duos ons e mez ha la giuvna duonna tschüf dandettamaing problems culla rain da maniera ch'ella nu d'eira plü abla da star sü. «Per furtüna n'haja pudü, grazcha a meis bap chi lavura a temp parzial pro'l Spitex, dumandar darcheu agüd. Dürant las duos eivnas chi m'han assisti da maniera exemplara n'haja pudü organiser l'agüd. In seguit n'haja fat üna cura da trais eivnas, d'ürant la quala eu am n'ha remissa fich bain tant ch'eu n'ha pudü tuornar pro mia famiglia», quinta Florence Emmenegger. Ella intuna cha las agüdonas sajan stattas ourdvert cordialas e flexiblas: «Schi nu's riva da far dandettamaing plü las lavuors da mamma e chasarina as tschüffa problems da psichica e'l ris-ch da gnir depressiv es grond. L'agüd da vaschins o amis es difficil d'or-

ganisar causa cha tuots lavuran. Per mai es stat il Spitex il salvamaint, eir grazcha a la cussagliaziun professionala.»

Spitex – organisaziun d'utilità publica

Pro quist'organisaziun lavuran in Svizra raduond 28 000 personas chi's partan raduond 12 000 piazzas plainas. Bundant 90 pertschient da las collavuraturas e dals collavuratuors sun ingaschats directamaing per l'agüd e la chüra. I's tratta lapro d'expert(a)s da chüra diplomats, d'expert(a)s i'l rom da la sandà, da chürunz(a)s da chasa, d'assist(a)s da chüra e d'agüdon(a)s da chasa. Il servezzan sta a disposiziun a tuot la glied da mincha età chi ha dabsögn d'agüd causa malatia, impedimaint, accidaint, vegldüm o maternità. La chascha d'amalats surpiglia sur la sgüranza fundamentala ils cuosts da la chüra ordinada tras ün meidi sco eir il sclerimaint a regard il bsögn. Daspö ils 1. schner 2008 sun las secziuns dal Spitex suottamissas als differents chantuns e quists pisseran per la finanziaziun.

Spitex Engiadina Bassa

Il territori da quista fundaziun chi fa part dal Center da sandà Engiadina Bassa cumpiglia la regiun da Zernez fin Samignun. La lavur principala sun prestaziuns da chüra, da chasada, d'assistenza sociala e da servezzans da past. Ulteriurs servezzans sun quel dal transport ed impraist d'indirizs pratics per amalats. In tuot sun ingaschadas

26 personas per agüd e chüra, 5 per la direzziun e 3 in l'administraziun. Quistas 34 personas lavuran in 17 e mez piazzas e pisseran per 136 cliaints. Dal 2008 sun gnüdas prestadas 17 360 uras chi sun scumpartidas in 3925 uras per l'economia da chasa, 2150 uras per l'assistenza, 10 930 per la chüra e'l rest per sclerimaint.